



La Quotidiana  
7007 Cuiria  
081/ 920 07 10  
www.laquotidiana.ch

Medienart: Print  
Medientyp: Tages- und Wochenpresse  
Auflage: 4'765  
Erscheinungsweise: 5x wöchentlich

Themen-Nr.: 278.13  
Abo-Nr.: 1015977  
Seite: 9  
Fläche: 42'529 mm<sup>2</sup>

# Origen experimentescha venavant

Igl program da stad 2010 è ancunaschaint



**Pizzas e muntognas dattan la culissa agl gi liber d'Origen sen igl pass digl Gelgia.**

DA GION NUTEGN STGIER / ANR

**Dimensiuns tgi Origen è anfignen oz anc mai gia. Per l'amprema geda surpasa igl festival cultural per las 120 produziuns la somma d'en milliun francs. Tot las produziuns on en connex cun la figura principala digl tema da chesta stad, «La regina da Saba».** «I dat strusch en migler li tgi igl pass digl Gelgia per inscengar igl maletg cura tgi igl rètg Salomo ratscheva a Jerusalem la regina da Saba», ò detg *Giovanni Netzer*, igl intendant digl Origen Festival Cultural,

ier agls represchentants dallas medias a Coira. Per ratschever la regenta d'Allarbia digl sid inscenescha igl rétg Salomo en act statal tgi savess betg esser pi pompous. An moda particulara tschertga Giovanni Netzer chesta stad da metter chel act sen tribuna. Igl pass digl Gelgia seia en li simbolic, igl li tgi colliescha nord e sid ed en li scu fatg per inscengar en act statal an chella furma. El seia per tschert tgi er durant la stad saptga igl pass digl Gelgia sa mussar dalla sia vart betg schi ampernevla. I seia da chintar cun tot las oras e perchegl vign construa aposta

pigl gi liber «La regina da Saba», ena «tgesa da teater» cun ena lunghezza da 50 m. Cun las provas ins ò gio scumanzo igl davos schaner e dalla parteida èn tot actours tgi absolvan ena scola da teater. Er per els è la produziun ena veira provocaziun, gioian els bung 70 minutas alla meta. Igl dretg effect agl toc sot tschiel avert dat *Lorenz Dangel*, igl cumponist da tgesa d'Origen, cun ramours tgi el ò per part catto ainten la nateira e musica tg'el ò sez cumponia. «Agl act statal lessa dar la dretga noda cun musica imposanta digl taimp baroc», ò Lorenz Dangel



La Quotidiana  
7007 Cuir  
081/ 920 07 10  
www.laquotidiana.ch

Medienart: Print  
Medientyp: Tages- und Wochenpresse  
Auflage: 4'765  
Erscheinungsweise: 5x wöchentlich

Themen-Nr.: 278.13  
Abo-Nr.: 1015977  
Seite: 9  
Fläche: 42'529 mm<sup>2</sup>

tradia dalla conferenza da medias, ier a Coira.

### Angal cuagl auto da posta

I seia betg angal finanzialmaintg ena provocaziun, dantant er logisticmaintg, ò detg Giovanni Netzer. 15 gedas preschainta Origen igl toc «La regina da Saba» sen igl pass digl Gelgia. La tribuna cun tetg tgi vign erigeida porscha plaz a 300 persungas. Igls visitaders digl teater sot tschiel avert von tots sen Gelgia cuagl auto da posta. Aint igl prietsch digl bi-gliet e cumpiglia igl viadi sen Gelgia ed anavos. Anfignen Beiva è pussebel dad eir cuagl auto, davent da lò resta navot oter tgi da far adiever digl auto da posta.

Sen buna veia da catter en urden resistant per tot las oras per igls vistgias digls actours è la firma da textilias Schläpfer da Son Giagl. Ena firma tgi fò adegna puspe gugent experimaints e tgi vo uscheia bagn a pèr cun Giovanni Netzer. La premiera digl gi agl liber «La regina da Saba» è igls 16 da fanadour 2010.

### Cant gregorian da mesanotg

Puspe dalla parteida è er igl cumediant *Fabrizio Pestilli*. El vign dantant betg a giuier cun la Compagnia Origen, mabagn a far la reschia. Passa 30 gedas preschainta la gruppa cun absolvents dalla scola da teater da Dimitri igl toc burlesc

«Makeda». A Coira ò li la premiera dalla cumegia noua tgi l'amour digl rètg Salomo tar la regina da Saba vign preschainta an ena moda pi divertenta. Er betg mantger chesta stad dastgan las guidas ainten differentas baselgias da Surmeir. La laudes, l'occurrentza cun cant gregorian allas 05.30 ainten la baselgia a Mistail, ò adegna li la dumengia. En oter experimaint fò Giovanni Netzer cuagl concert «Nocturn», tgi vign interpreto dalla gruppa choral «Cantoris» e chegl da mesanotg aint igl Casti da Riom. Daples infurmaziuns dattigl segl internet sot l'adressa: [www.origen.ch](http://www.origen.ch).